



XUNTA DE GALICIA

VICEPRESIDENCIA SEGUNDA E  
CONSELLERÍA DE ECONOMÍA,  
EMPRESA E INNOVACIÓN



**CONVENIO ENTRE A AXENCIA GALEGA DE INNOVACIÓN (GAIN), O INSTITUTO GALEGO DE PROMOCIÓN ECONÓMICA (IGAPE), E A CONFEDERACION DE EMPRESARIOS DE LUGO (CEL), PARA A POSTA EN MARCHA DA INICIATIVA 'CONNECT LUGO'**

**MEMORIA XUSTIFICATIVA**

A subdirectora de Recursos Humanos e Xestión Administrativa do Instituto Galego de Promoción Económica (IGAPE)

**DECLARA:**

Que este Instituto ten previsto formalizar coa AXENCIA GALEGA DE INNOVACIÓN (GAIN) e a CONFEDERACIÓN DE EMPRESARIOS DE LUGO (CEL) o instrumento convencional arriba referido por un período de vixencia que abrangue dende o día da súa sinatura ata o 30 de decembro de 2021.

Que o instrumento convencional ten por obxecto:

*Sentar as bases de colaboración entre as partes para a posta en marcha e o desenvolvemento de CONNECT LUGO, unha iniciativa de carácter transversal orientada a expandir os puntos de información e asesoramento cos que conta a CEL ás zonas Norte e Sur da provincia de Lugo, mediante a apertura de dous puntos de información e asesoramento, un en Viveiro/Ribadeo e outro en Monforte de Lemos; así como a realización dunha labor divulgativa e de detección de potencial innovador entre o empresariado e os emprendedores lucenses.*

Que existe converxencia de intereses entre as entidades asinantes en orde á consecución do obxecto referido.

Que o instrumento convencional que se pretende asinar fundaméntase no seguinte:

*GAIN é unha axencia pública autonómica adscrita á Vicepresidencia Segunda e Consellería de Economía, Empresa e Innovación, creada polo Decreto 50/2012, do 12 de xaneiro, ao amparo da autorización prevista na disposición adicional segunda da Lei 16/2010, do 17 de decembro, de organización e funcionamento da Administración xeral e do sector público autonómico de Galicia que, de acordo cos seus estatutos, ten como finalidade fomentar e vertebrar as políticas de innovación nas administracións públicas galegas e o apoio e impulso do crecemento e da competitividade das empresas galegas, a través da implementación de estratexias de innovación eficientes. Para a consecución dos seus obxectivos, de acordo co artigo 10 dos seus Estatutos, poderá colaborar con outras administracións públicas, no ámbito das súas respectivas competencias e funcións, e con entes do sector privado, a través dos correspondentes convenios.*





*IGAPE é un ente de dereito público, adscrito á Vicepresidencia Segunda e Consellería de Economía, Empresa e Innovación para o desenvolvemento económico de Galicia. A súa misión é a de apoiar todas as actividades que contribúan a mellorar o sistema produtivo galego, facilitando os procesos de creación, consolidación e crecemento empresarial.*

*CEL é unha entidade sen ánimo de lucro, de carácter intersectorial e de ámbito provincial, creada no ano 1977 ao amparo da Lei 19/1977, de liberdade sindical, do 1 de abril. Dende a súa creación sempre defendeu e apoiou calquera iniciativa que supuxera un beneficio para os empresarios e a provincia, asumindo a responsabilidade de traballar para garantir o progreso de Lugo. O seu impulso definitivo como entidade representativa do empresariado lucense tivo lugar na década dos 90, incrementándose entón os servizos da CEL, creando a Axencia do Emprego da CEL, o Centro de Información e Servizos Empresariais (CISE), que actualmente constitúe a Escola de Empresarios e Centro de Formación da CEL e creáronse, así mesmo, tres oficinas de atención ao empresariado localizadas entón en Burela, Ribadeo e Monforte de Lemos, co fin de facilitar o acceso aos servizos. Estes puntos de atención ao empresariado da provincia non se atopan en funcionamento na actualidade a causa das dificultades para o seu sostemento económico.*

*A Xunta de Galicia aposta pola difusión e acercamento das posibilidades da innovación, a competitividade, a transformación dixital en todo o tecido empresarial galego como vía ineludible para garantir a futuro a capacidade competitiva das empresas e a súa permanencia no mercado e para iso debe tecer a rede máis extensa e vertebrada posible en todo o territorio, de modo que esta cultura da innovación e a transformación dixital alcance e poida ser comprendida e interiorizada no máximo espectro empresarial en todo o territorio galego. A través da Vicepresidencia Segunda e Consellería de Economía, Empresa e Innovación, publicou a Axenda de Competitividade Galicia Industria 4.0, na que se recollen os plans de impulso, os enfoques estratéxicos e as medidas para impulsar en Galicia o renacemento dunha industria renovada, moderna, innovadora e competitiva a nivel global.*

*A Lei 5/2013, do 30 de maio, de fomento da investigación e a innovación de Galicia, dispón no seu artigo 2 que a mesma ten como obxectivo coordinar e potenciar os esforzos destinados a promover o coñecemento científico, contribuír eficazmente á consolidación da posición das empresas e institucións galegas no ámbito competitivo europeo e internacional, e posibilitar un cambio no modelo produtivo galego cara outro centrado na innovación. Este programa alinéase, tanto coas previsións recollidas na Lei 5/2013, de fomento da investigación e a innovación de Galicia, como nas prioridades contidas na Estratexia de Especialización Intelixente de Galicia 2014-2020 (“RIS3”), así como no programa marco de dita Estratexia denominado “Emprendemento Innovador”. En particular, estímase esencial para a Estratexia RIS3 Galicia adoptar como prioridade a diversificación nos sectores tractores galegos e sectores auxiliares a través do uso*





*intensivo das Tecnoloxías Facilitadoras; uso orientado á provisión de novos procesos e produtos de alto valor engadido que permitan explorar novos mercados baseados na hibridación, o coñecemento e a tecnoloxía (como, por exemplo, a industria aeroespacial).*

*CEL ten entre os seus obxectivos prioritarios actuais o de proporcionar un espazo de encontro e oportunidades ás empresas da provincia, así como representar os seus intereses ante a Administración e outras entidades públicas e privadas; prestar aos asociados servizos de máxima calidade entre os que se atopan a información e asesoramento, a realización de estudos e informes referidos a necesidades e aspectos económicos, sociais e empresariais da provincia de Lugo, contribuíndo así ao desenvolvemento económico e a creación de emprego na provincia.*

*De acordo cos antecedentes anteriormente indicados e coas previsións contidas nas referencias normativas sinaladas, e tendo en conta o evidente beneficio que actividades a desenvolver conxuntamente no ámbito da información, a concienciación, o asesoramento e a formación en materias imprescindibles para as empresas e de especial interese para a Xunta de Galicia, como son a innovación e a transformación dixital como medios para conseguir a competitividade presente e futura das empresas galegas, e o impacto beneficioso que iso reporta ao conxunto da sociedade, GAIN, IGAPE, e CEL, teñen interese en xuntar esforzos e poñer en común as súas sinerxías e experiencia en pro da concienciación e capacitación en innovación empresarial e transformación dixital que deberán constituír un importante estímulo ao crecemento económico da Comunidade Autónoma de Galicia.*

*Polo nivel de representatividade que a CEL ten no empresariado da provincia de Lugo, polo seu carácter multisectorial, polo diverso perfil das empresas asociadas, así como pola capacitación e experiencia do seu equipo directivo e persoal técnico, e pola necesaria colaboración que de modo implícito debería realizarse entre as dúas entidades públicas e a CEL para evitar duplicidades e solapamentos ao dirixirse na súa labor de difusión e concienciación aos mesmos usuarios e con similares servizos, en busca da eficiencia na aplicación dos recursos escasos, e do efecto sinerxía, enténdese que xustifica suficientemente a oportunidade de colaboración para a realización das accións obxecto do convenio.*

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o





recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela.

A subdirectora de Recursos Humanos e Xestión Administrativa  
Teresa Carrera Babarro

